

ТОВЧ ТАНИЛЦУУЛГА

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн тухай

Монгол Улсын гадаад харилцаа өргөжин хөгжихийн хирээр иргэдийн гадаадад суралцах, ажиллах болон бизнес, аялалын чиглэлээр харилцан зорчих явдал нэмэгдэж байгааг харгалзан монголчууд ихээр зорчиж, амьдарч, мөн ажил хөдөлмөр эрхэлдэг улс орнуудтай эрх зүйн туслалцаа харилцан үзүүлэх тухай гэрээ хэлэлцээр байгуулах асуудалд тус яамнаас анхаарал хандуулан ажиллаж байна.

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр” нь 5 хэсэг, 29 зүйл, хавсралтаас бүрдэж байгаа бөгөөд уг хэлэлцээрийн хүрээнд зохион байгуулалттай гэмт хэргээс урьдчилан сэргийлэх, илрүүлэх, гэмт хэргийн зохион байгуулагчийг олж тогтоох чиглэлд талуудын хамтын ажиллагааг хөгжүүлэн бэхжүүлэх, олон нийтийн аюулгүй байдал, хэв журам зөрчигдөхөөс урьдчилан сэргийлэх чиглэлд хоёр улсын эрх бүхий байгууллагууд өөр хоорондоо шууд харилцаж, түргэн шуурхай хамтран ажиллах боломжтой юм.

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн төслийг Улсын Их Хурлын Хууль зүйн байнгын хороо болон Аюулгүй байдал, гадаад бодлогын байнгын хорооны 2025 оны 03 дугаар сарын 10-ны өдрийн хуралдаанаар тус тус хэлэлцэн дэмжиж, гарын үсэг зурах эрхийг Засгийн газарт олгосноор уг хэлэлцээрт Талууд 2025 оны 03 дугаар сарын 10-ны өдөр Бүгд Найрамдах Чех Улсын Прага хотноо гарын үсэг зурсан.

Энэхүү хэлэлцээр нь Олон улсын гэрээний тухай хуулийн 8 дугаар зүйлийн 8.1.4 дэх заалтад заасны дагуу эрх зүйн туслалцаа үзүүлэхтэй холбогдсон заавал соёрхон батлах олон улсын гэрээ бөгөөд мөн хуулийн 16 дугаар зүйлийн 16.1 дэх хэсэгт заасны дагуу уг хэлэлцээрийг соёрхон батлах тухай хуулийн төслийг Засгийн газрын хуралдаанаар хэлэлцүүлэн Улсын Их Хуралд өргөн мэдүүлж, батлуулах юм.

ДЭЛГЭРЭНГҮЙ ТАНИЛЦУУЛГА

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн тухай

Монгол Улсын гадаад харилцаа өргөжин хөгжихийн хирээр иргэдийн гадаадад суралцах, ажиллах болон бизнес, аялалын чиглэлээр харилцан зорчих явдал нэмэгдэж байгааг харгалзан монголчууд ихээр зорчиж, амьдарч, мөн ажил хөдөлмөр эрхэлдэг улс орнуудтай эрх зүйн туслалцаа харилцан үзүүлэх тухай гэрээ хэлэлцээр байгуулах асуудалд тус яамнаас анхаарал хандуулан ажиллаж байна.

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр” нь 5 хэсэг, 29 зүйл, хавсралтаас бүрдэж байгаа бөгөөд 1 дүгээр хэсэгт хэлэлцээрийн гол зорилго, талуудын хамтран тэмцэх, урьдчилан сэргийлэх зохион байгуулалттай гэмт хэргийн төрөл, хэлбэрийг тусгайлан авч үзсэн бол 2 дугаар хэсэгт хамтын ажиллагааны чиглэл, тэр дундаа талуудын эрх бүхий байгууллагууд гэмт хэрэг үйлдсэн зохион байгуулагч, тэдгээрийн холбоо хамаарал, бүтэц, гэмт хэрэг үйлдэхдээ ашигласан арга техник, мөн террорист бүлэглэл, тэдгээрийн үйлдсэн гэмт хэрэг, цогцост шүүх шинжилгээний байгууллагаас хийсэн үзлэг, шинжилгээний дүгнэлт, криминологийн судалгаа, мөрдөн шалгах ажиллагааны арга тактик, түүнчлэн талуудын нутаг дэвсгэрт хилээр нэвтрэхдээ ашигласан бичиг баримт, оршин байгаа газар гэх зэрэг мэдээлэл, цагдаагийн байгууллагын бүртгэл, мэдээллийн сангийн мэдээллийг харилцан солилцохоос гадна талуудын хамтын ажиллагаанд дэмжлэг үзүүлж, зөвлөгөө өгч ажиллах чиг үүрэг бүхий офицер, зөвлөх гэх мэргэжилтнүүдийг харилцан илгээхтэй холбоотой харилцааг зохицуулсан.

Мөн талууд сургалтын чиглэлээр хамтран ажиллах буюу хамтарсан сургалт, семинар, дадлага, сургуулилалт, хэлний сургалт зохион байгуулах, мэргэжилтнүүдийг сургах ба үүнд тодорхой ажилтныг томилон оролцуулах, сургалтын агуулга, хөтөлбөрийг боловсруулахад шинжээчдийг харилцан оролцуулах, дадлага, сургуулиалтад ажиглагчдыг оролцуулах зэрэг асуудлыг тусгасан.

Хэлэлцээрийн 3 дугаар хэсэгт хамтын ажиллагааны тусгай хэлбэрүүд буюу тусгай хамгаалалт шаардагдах аливаа этгээдийг хамгаалах, тээвэрлэх, хилээр нэвтрүүлэх, уг этгээдэд холбогдох бүхий л төрлийн мэдээллийг харилцан солилцох, түүнчлэн талууд “Гамшгийн үеийн хохирогчийг тодорхойлох баг”-ийг томилох замаар тодорхой төрлийн ажиллагааг гүйцэтгүүлэхээр хэлэлцэн тохирогч нөгөө талын нутаг дэвсгэрт илгээх асуудлыг тусгасан.

Хэлэлцээрийн 4 дүгээр хэсэгт талууд хувийн мэдээллийг авахаар нөгөө талдаа хүсэлт гаргах, хүсэлтийн дагуу мэдээллийг шилжүүлэх, мэдээллийг хүлээн авсан талын мэдээллийг бүртгэх, ашиглах, хамгаалах устгах арга хэлбэрийг тодорхойлсон.

Хэлэлцээрийн 5 дугаар хэсэгт хэлэлцээрийг хэрэгжүүлэхэд ашиглах хэл, хэлэлцээрийг хэрэгжүүлэх, хэрэглэхтэй холбоотой маргаан гарсан тохиолдолд түүнийг шийдвэрлэх арга зам, хэлэлцээрийг дуусгавар болгохтой холбоотой харилцааг зохицуулсан бөгөөд хавсралт хэсэгт талуудын дотоодын хууль тогтоомжийн дагуу тогтоосон нууцын ангилал, зэрэглэлийг дүйцүүлэн заасан ба талууд харилцан мэдээлэл солилцохдоо энэхүү хавсралтад заасан нууцын зэрэглэлийг илэрхийлсэн тэмдэглэгээг хэрэглэх тухай асуудлыг тусгасан.

Уг хэлэлцээрийн хүрээнд зохион байгуулалттай гэмт хэргээс урьдчилан сэргийлэх, илрүүлэх, гэмт хэргийн зохион байгуулагчийг олж тогтоох чиглэлд талуудын хамтын ажиллагааг хөгжүүлэн бэхжүүлэх, олон нийтийн аюулгүй байдал, хэв журам зөрчигдөхөөс урьдчилан сэргийлэх чиглэлд хоёр улсын эрх бүхий байгууллагууд өөр хоорондоо шууд харилцаж, түргэн шуурхай хамтран ажиллах боломжтой юм.

Мөн энэхүү хэлэлцээрээр дамжуулан эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд хоёр улсын цагдаагийн байгууллагын мөрдөгчид эрх зүйн туслалцааны хүсэлт гаргах замаар гэрч, шинжээч, сэжигтэн, яллагдагч болон бусад этгээдээс тайлбар, мэдүүлэг авахаас гадна талууд хэрэг хянан шийдвэрлэх ажиллагааны нууцад хамаарах баримт бичиг, мэдээлэл, нотлох баримтыг харилцан солилцох боломжтой.

Түүнчлэн хэлэлцээрийн дагуу талуудын эрх бүхий байгууллагуудын алба хаагчид хэлэлцэн тохирогч нөгөө улсын нутаг дэвсгэрт ажиллагаа гүйцэтгэх, ингэхдээ өөрсдийн биедээ авч ирсэн галт зэвсэг, сум, бусад тоног төхөөрөмж, тээврийн хэрэгсэл, агаарын хөлөг, албаны нохой, уналга морь зэргийг ашиглах боломжтой ба талуудын эрх бүхий байгууллагууд “Гамшгийн үеийн хохирогчийг тодорхойлох баг”-ийг нөгөө улсын нутаг дэвсгэрт харилцан томилох замаар тодорхой төрлийн ажиллагааг гүйцэтгэхтэй холбогдох харилцааг мөн зохицуулсан.

Бүгд Найрамдах Чех Улсын эрх бүхий байгууллагаас 2020-2025 онд эрүүгийн хэрэгт эрх зүйн туслалцаа үзүүлэх хүсэлтийн хүрээнд нийт 8 эрх зүйн туслалцааны хүсэлт (2020 онд 1, 2021 онд 1, 2022 онд 2, 2023 онд 2, 2024 онд 1, 2025 онд 1)-ийг тус яаманд ирүүлснийг холбогдох байгууллагад уламжилж, хүсэлтийн гүйцэтгэлийн хариуг тус улсын Хууль зүйн яаманд хүргүүлж байсан.

Одоогийн байдлаар Бүгд Найрамдах Чех Улсад танхайрах, бусдад хүч хэрэглэх, хулгайлах хэргээр манай улсын 4 иргэн хорих ял эдэлж байгаа бол 2024 онд оршин суух зөвшөөрөлгүйн улмаас 51 иргэн саатуулагдан шалгагдсан бөгөөд 2 иргэн гэмт хэргийн хохирогч болсон статистик мэдээлэл байна.

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн төслийг Улсын Их Хурлын Хууль зүйн байнгын хороо болон Аюулгүй байдал, гадаад бодлогын байнгын хорооны 2025 оны 03 дугаар сарын 10-ны өдрийн хуралдаанаар тус тус хэлэлцэн дэмжиж, гарын үсэг зурах эрхийг Засгийн газарт олгосноор уг хэлэлцээрт Талууд 2025 оны 03 дугаар сарын 10-ны өдөр Бүгд Найрамдах Чех Улсын Прага хотноо гарын үсэг зурсан.

Энэхүү хэлэлцээр нь Олон улсын гэрээний тухай хуулийн 8 дугаар зүйлийн 8.1.4 дэх заалтад заасны дагуу эрх зүйн туслалцаа үзүүлэхтэй холбогдсон заавал соёрхон батлах олон улсын гэрээ бөгөөд мөн хуулийн 16 дугаар зүйлийн 16.1 дэх хэсэгт заасны дагуу уг хэлэлцээрийг соёрхон батлах тухай хуулийн төслийг Засгийн газрын хуралдаанаар хэлэлцүүлэн Улсын Их Хуралд өргөн мэдүүлж, батлуулах юм.

---oOo---